

四庫全書

集部

欽定四庫全書

華陽集卷五十三

宋 王珪 撰

墓誌銘

宗室金紫光祿大夫檢校太子賓客使持節復
州諸軍事復州刺史充本州防禦使兼御史大
夫上柱國開國侯食邑三千戶食實封五百戶
贈寧國軍節度觀察留後追封宣城郡公墓誌
銘

皇姪贈寧國節度觀察留後追封宣城郡公諱從審字叔度太祖皇帝之曾孫吳懿王諱德昭之孫贈永清軍節度觀察留後安定郡公諱惟和之子初命為右班殿直歷左右侍禁東西頭供奉官上初纂服改內殿崇班累遷東染院副使景祐中朝廷推屬籍之寵並實環衛遂改千牛衛大將軍尋領賀州刺史又遷筠州團練使歷左領軍大將軍祀明堂恩拜復州防禦使皇祐三年五月十八日以疾終於宮邸上初聞疾亟遣太醫診視

賜以御奩之藥又命中貴人臨撫者相望于道計聞天子震嗟不已為輟視朝刻以留印直以公土襚於柩前享年四十六公安性端毅喜怒靡形于色下雖輿隸之屬咸以時進退肅然如官庭日內朝衣冠雍容未始以風雨輟廢也每退處燕閒延禮髦俊授禮記左氏春秋反復不倦由是頗識聖人大趣又通陰陽方技之樂晚尤喜釋氏書晨起趺坐諷念精進以性理為適公奉身清約嘗自以荷天家之蔭享貴盛日久念亡以報國一

日悉陳家所藏環奇之玩輸之內府上問所欲公頓首
謝初無所覲上嘉其忠篤之至亦寵答之娶吳氏贈宿
州觀察使守禮之女燕國大長公主之孫德儀柔嘉休
有壺範子十人世英右監門衛將軍世堅世及皆蚤卒
皆贈左武衛大將軍世卿亦蚤卒贈右監門衛將軍世
肱右千牛衛將軍世禕世總並太子右監門率府率世
仍太子右內率府副率戚藩之英咸師教義餘二子不
毓女五人長適右班殿直李彥伯蚤卒次適右侍禁武

振封永康縣君次適左侍禁鄭士寧封永康縣君二女
尚幼孫五人令纘令驛令琇令課令簽並太子右內率
府副率嘉祐五年庚子十月丙辰朔三十日乙酉葬於
河南永安縣之原申命禁林以識不朽銘曰顯允宣城
邦之英戚不矜於盈義訓是迪驛車以朝有煒振振器
抑於用美懷莫申皇帝仁恩燦燦九族宜熾而艾胡奪
之速山之隆高水之環紆歸將安之以寧茲墟

宗室金紫光祿大夫檢校太子賓客左屯衛大

將軍使持節信州諸軍事信州刺史充本州團練使兼御史大夫上柱國開國公食邑三千戶食實封二百戶贈定州觀察使博陵侯墓誌銘

皇祐四年秋八月甲午上之再從姪左屯衛大將軍信州團練使諱從質疾且革先令諸子曰我幸得託肺腑未始有過失卒有不可諱毋傷生重費以累其後人言訖而逝上聞惻然加閔以定州觀察使博陵侯之祿告其第侯字子野太祖皇帝之曾孫祥符初以屬籍補西

頭供奉官上初纂極累遷八作副使景祐中朝廷以本
支之隆名秩未稱遂改千牛衛大將軍久之領蜀州刺
史又遷左屯衛大將軍從祀明堂汎澤天下遂有信州
之拜侯志行修潔內和而外介其天性孝友伯氏睦州
團練使從謹被病日寢劇鍼砭所不可及侯遽入臥內
封股肉以進翼日疾迺瘳上嘉其篤愛中出金繒以撫
之侯席貴盛日久奉已簡儉以廩賜之餘累獻器御府
無慮以萬計上檻章再至遣問其所欲言蒙國

厚恩豈復以微寵必不得已願朝廷擇儒碩之臣以訓
勅子弟使得親名教之樂不勝幸甚上亟命有司從所
請侯清淨少欲涉于經史入侍禁闥幾三十年出處無
泰色有若寒素之起家者上亦知其樂善無厭賞錫以
御閑之駿他日又賜飛白書以旌寵之其治家有規檢
後堂無箏絃之音輕財好施調族人之急不問有無惟
恐其不至故啟手之夕邸中無老幼為之扶服泣下享
年四十三祖德昭吳王謚曰懿父惟忠贈彰化軍節度

使舒國公夫人吳氏供備副使守巖之女燕國大長公主之孫封懷安郡君德度幽閒儀于夫族子十人世哲世京世頤世表世鎮世蒙世疆並屯衛將軍世敞右監門率府率世灼世系並右內率府副率皆端厚之器以承高華女十二人長適潘孝安次適王昉次適王正卿次適吳師民次適李可益皆啟封縣君餘未行嘉祐五年十月乙酉葬於河南之永安縣有詔禁林按閱以銘銘曰博陵溫溫學幾于原士見窮戚乃志乎勤侯雖富

貴匪佚之聞獻珍內府人則有靳侯拜稽首以感以欵
海纏於哀行者為涕天子盡然朝亦輟視賢者多後以
大以延勒銘紀休於萬斯年

宗室金紫光祿大夫檢校國子祭酒右屯衛大
將軍兼御史大夫輕車都尉天水郡開國伯食
邑九百戶贈洛州防禦使廣平侯墓誌銘

皇姪孫諱世崇字德卿吳懿王諱德昭之曾孫彰化軍
節度使舒國公諱惟忠之孫宣州觀察使宣城侯諱從

謹之長子也景祐初以右侍禁改遣太子右衛率府率
累遷右屯衛大將軍皇祐四年冬十二月感疾再夕而
亡是月二十有八日也天子聞之嗟悼贈洺州防禦使
廣平侯享年三十有二侯少聰悟多知逮成人卓犖有
奇節其氣尚介直每會議邸中立辯其是非不為貴倨
所屈頗涉經史百家之學嘗詰官寮孫復案襄公十二
年魯有周廟然諸侯不敢祖天子大夫不敢祖諸侯魯
安得祖文王乎左丘明親接聖人之迹而禮記夫子所

修顧有異指邪復雅有經術退而深奇其言宣城知其
喜學日延侍講揚中和講受其師說由是通左氏春秋
最為深又善為辭賦溫麗殊可觀乘暇則率賓族命射
其發必中人莫能及宣城之寢疾也每嘗藥以進晝夜
不解帶者益累月矣其執喪哀瘠甚宗室稱其孝晚尤
喜禪說其終也中固靡亂豈達死生之理邪娶錢氏無
子其側室生一男令嘖太子右衛率府率一女尚幼嘉
祐五年十月乙酉葬於河南永安縣之原銘曰不流庠

紛迺帥以履敏而好文賢于宗子天胡奪年弗永厥休
法應有銘以詔于幽

宗室丹陽郡王夫人任城郡夫人魏氏墓誌銘

夫人姓魏氏始晉畢萬封於魏其後或徙任城者世為
任城人曾祖諱仁浦贈尚書令中書令封秦王祖諱咸
美左神武大將軍父諱昭吉左班殿直母曰晉寧縣君
李氏夫人少最孤從祖駙馬都尉咸信撫育之甚愛都
尉為戚里之冠夫人既長又有淑德遂歸於丹陽郡王

王諱守節益上之諸姪也夫人賢而知禮承上遇下無間言春秋奉祀必躬遵篚之事先是諸王夫人誕日賞賜燕第中至夫人上又特命使以將其寵族人榮之丹陽之捐館舍殆二十年夫人退尚簡素其服玩無纖靡之飾區處閭事無不有條理諸子亦承其母訓以立嘉祐三年冬王邸災詔徙別第明年三月一日暴感疾遂終於寢享年五十七封任城郡夫人上聞加惻卹賻殊厚勅入內供奉官鄧惟濟典治喪事寓殯於法濟佛寺

又明年十月乙酉舉夫人之喪歸祔於河南永安縣丹陽王之瑩子七人世永左屯衛大將軍光州團練使邢國公世延右監門衛大將軍欽州刺史世符右領軍衛大將軍世寵終太子右司禦率府副率餘蚤亡女七人長適閤門宣事舍人郭士遜次適東頭供奉官魏堯卿次適西頭供奉官吳舜卿次適左侍禁王誨次適西頭供奉官鄭价孫皆啓縣封餘蚤亡孫男十二人令圖令瑤令樞令轂令續諸衛將軍令緋令朔令擢令躅令羽

令拜太子右內率府率若副率一未賜名孫女八人長
適左班殿直時觀次適右班殿直吳真卿六尚幼曾孫
二人子張率府率子野副率銘曰燕婉夫人王邸之從
不矜于貴迺迪婦功象服紆徐沒猶有紀誰如夫人見
曾孫子

壽安縣太君呂氏墓誌銘

夫人姓呂氏其先并州人曾大父諱夢奇贈太師尚書
令大父諱龜祥贈太師中書令父諱夢巽尚書虞部員

外郎知海州贈太常少卿夫人實第三女也海州之從
兄宮師文穆公太平興國中策進士第一未幾致位宰
相被兩朝顧遇固隆貴矣與海州素相友愛故久留轍
下不得補官於外夫人既生相家文穆見每奇之以謂
殊非諸女之儔太尉文靖公海州之兄子也少時嘗親
帥諸子弟厲志於學夫人方幼見文字輒喜於是汎通
詩書百家之學文靖嘆曰信矣諸父之言吾祖尚書有
重名天下為兩浙轉運使方是時海州宰蘇之吳縣夫

人遂歸我伯父少卿少卿諱單字慶之尚書次子也潛心經術嘗疾世之詭隨故持論方介不為勢少屈海州之壻共五人有過郡者率陳以鐘鼓觴豆之娛及遇少卿則肅其衣冠終日語不及私少卿天性孝篤侍尚書左右二十餘年未始一日違去而夫人佐蒸嘗之事春秋益虔少卿臨事素嚴夫人治家亦有法閭內肅然如官廷不幸少卿暴疾早世夫人方年三十餘躬治喪於廣陵既而攜諸孤往依廬江伯父侍郎之官下一日泣

謂諸子曰汝父病且革猶語我且善勉汝等汝鍾罰不
天何以奉遺言諸子號頓咸自言願夙夜勉力不敢墜
先人之緒業夫人於是盡屏珠玉之飾市書環室親授
經義日月漸劇卒至於有成其後昆弟仕稍進夫人或
歲過諸子始至必進壽於堂子婦拜於庭諸孫詵詵於
前夫人喜甚因曰其益思盡忠于迺事若夫極嘉旨之
奉殆匪親意也夫人素貴能謙下其德舉得宗族之歡
心晚尤愛京洛之風長子因請畿之太康未幾夫人感

疾終於官第實嘉祐四年三月某日也享年七十封壽
安縣太君明年卜葬少卿於揚州某縣某鄉之原以夫
人祔焉其用十月壬申之吉子三人璉尚書比部員外
郎珣尚書職方員外郎璩杭州南新縣令孫男十五人
仲均舉進士仲猷太廟齋郎次仲鄰仲說仲蒙仲威餘
尚幼孫女三人珪昔之髧兩髦蒙夫人器獎之甚異逮
珪之塵二禁猶見夫人無恙時今將葬矣而不得引車
綍于墓下追惟平昔之知音徽永已痛孰甚哉泣以銘

曰慙彼夫人文穆賢之歸我伯父佐祀以時山陽之終其節介介誰勉諸子話言猶在仕既及親安輿屢適匪樂嘉旨又飭以職晚愛京師顧懷逶迤卒隕于畿如達之歸靈龜食郊葬則同穴其後以延德芬勿絕

趙宗旦妻賈氏墓誌銘

夫人皇姪密州觀察宗旦之夫人其姑曰延安郡太君初上在儲宮章聖皇帝擇宗子之謹良者無如觀察於是命觀察從上就學資善堂凡與上起居飲食靡有所

間久之章獻皇太后召延安郡太君謂曰宗旦且有立
矣宜得名門之配於是出訪衣冠舊族聞夫人淑茂有
女德太后召至禁中問其家世其大父昭州團練使賈
宗者元從先帝邸中雅有勲勞太后喜甚賜以御所之
衣其嫁天聖十年正月十一日也尋封河內郡君夫人
柔明德量撫內外姻族恩意燦然治家尤有法喜讀書
通論語孝經大義夫人初為太后所知觀察又嘗輔今
上有舊恩然而終不自言茲亦內助之賢者已嗚呼賦

命弗融以慶歷八年正月十二日終于睦親之第享年
三十五上聞為輟視朝一日禮賻加厚特贈永嘉郡夫
人非常比也又詔中使領喪事寓殯於奉先佛寺父德
滋左班殿直以疾休於家故弗之顯生七男仲玘右監
門衛大將軍仲寅贈右屯衛大將軍仲淹右千牛衛將
軍仲浹仲適並太子右監門率府率餘蚤亡三女適左
班殿直曹希文者封仁和縣君餘蚤亡孫男三人士佺
士歸並太子右內率府副率一未賜名孫女六人在室

嘉祐五年十月乙酉葬於河南永安縣之原銘曰孰聞夫人曰言曰容獻后母臨入見禁中訪其氏族舊邸之功以歸戚藩豈不謂賢維子維孫詵詵於前其葬嘉阡其後以延

安陸侯妻賈氏墓誌銘

郡君姓賈氏曾祖廷環累贈左神武大將軍祖官至四方館使昭州團練使父德滋前左班殿直夫人以選歸於安陸侯宗訥至和元年五月乙卯以疾卒享年三十

有六權厝於薦嚴佛寺以嘉祐五年十月乙酉祔安陸
侯以葬銘曰配德惟諧卜藏斯吉其固其安同於此室

欽定四庫全書

卷五十三

欽定四庫全書

華陽集卷五十四

宋 王珪 撰

墓誌銘

宗室金紫光祿大夫檢校太子賓客左屯衛大將軍使持節雄州諸軍事雄州刺史充本州防禦使兼御史大夫上柱國榮國公食邑三千八百戶食實封七百戶贈保寧軍節度使追封楚國公墓誌銘

彰化軍節度使舒國公惟忠之子七人爲左屯衛大將軍雄州防禦使者其幼子也藝祖皇帝之曾孫吳懿王德昭之孫母曰任國夫人田氏生甫踰年即賜名曰從信除左班殿直明道元年積遷內殿承制尋徙東八作使景佑二年朝廷以環衛之秩大更宗子官遂改右千牛衛大將軍歷簡州刺史皇祐二年進左屯衛大將軍秀州團練使初燕恭肅王既薨其後宗室稍寢封建之制天子念骨肉之深至是大宗正濮安懿王始王汝南

而諸王邸又使世有公爵之封久之公伯氏韓國公且
薨嘉祐二年遂進爵榮國公己而又進以所終之官後
五年十二月十四日以疾薨于寢享年五十有一上撫
几而悼之輟眎朝一日遣入內都知李允恭典護喪事
以太常鹵簿鼓吹導殯于國南奉先佛寺納書以保寧
軍節度使楚國公印綬告其靈公於屬籍盖今上之從
兄字君瑞少而警悟如成人舒國公之捐館纔四歲哀
慟不息見者爲之感歎太夫人鍾愛獨深撫教之未始

去左右及侍母疾蚤夜不解帶而卜祠藥膳之無不至
重離內難頓踴叫號幾不能生于是宗族以孝聞公覽
六經百氏之書至於御射音律之學所通靡不精一日
謂諸宗子曰天子擇行義經術之士入教於宮今倚席
不講豈稱所以獎育之意邪于是延學官堂上終日敷
經授義靡然嚮風因復勅之曰吾幸生盛時蒙祖宗之
休出入禁闥四十餘年雖不見用然未嘗有過失觀宗
室中壽罔克以長豈膏粱玉帛非所以輔養性命者歟

若曹當勉志於學毋自靡於驕華也公又謂唐十院置
維城庫約諸王稟入而上下均其用今雖奉養之費一
出縣官然屬大者猶或不給且諸王邸多殖產井市日
以取其資惟懿王院初無餘財因令治一庫帥諸宗子
月視祿之厚薄而十輸之一不得輒私以費于是車馬
賓客冠昏喪祭之禮無不獲其助今其法不廢公風度
偉特外嚴而中夷治家肅然如官庭頗恬於聲利位出
公下者或以曲恩遷去視之泊如不以介介其中也方

朝廷以執祖之後名禮未稱公於懿王之裔且爲長有
司議將進位而會公薨故飾終之典非前後所侔夫人
孫氏贈太子太師承祐之孫輔佐有賢德子男三十七
人曰世顯曰世淵皆右領軍衛大將軍曰世爽曰世逢
曰世燮曰世鴻皆右監門衛大將軍曰世登曰世耀曰
世福曰世窮皆右千牛衛將軍曰世榮曰世掌曰世闡
曰世重曰世職曰世根曰世引曰世肱曰世親曰世凡
曰世資曰世劬曰世造曰世藩皆右監門率府率餘早

亡女十九人適武亢者封秀容縣君適徐璋者封河間
縣君適徐保恩者封萬年縣君繇亢而下皆供奉官適
張從權者封樂壽縣君適王立者封福昌縣君繇從權
而下皆侍禁六未筭餘早亡孫男十七人曰令典右監
門衛大將軍曰令扁曰令威曰令躋曰令穆曰令志曰
令攄曰令羣曰令攝曰令優曰令貫曰令哿皆右監門
率府率餘未賜名明年十月甲午從仁宗皇帝西葬河
南永安之原其將葬也宮寮臣恂上公之行於太常而

博士臣夏卿作謚曰安僖有詔銘其墓中太史臣珪實
爲之銘曰於赫皇祖有烈自先神明其祚本支萬年顯
允楚公實大土宇乘馬路車來燕來譽華堂隆隆公子
之娛公勅公子以詩以書天子念公名禮未報其贈伊
何高幢副纛公喪既西三川逶迤有臣太史作爲銘詩
宗室金紫光祿大夫檢校國子祭酒右屯衛大
將軍使持節達州諸軍事達州刺史兼御史大
夫上護軍天水郡開國公食邑二千一百戶贈

洋州觀察使洋川侯墓誌銘

皇姪贈洋州觀察使洋川侯諱世昌字保之曾祖德昭
吳懿王祖惟忠彰化軍節度使舒國公父從恪萊州防
禦使東萊侯母曰平原郡夫人米氏生十年天聖七年
始頒名於朝補右班殿直累遷左侍禁改太子右衛率
府率歷右領軍衛將軍皇祐二年宗祀明堂進右屯衛
大將軍嘉祐五年加達州刺史明年六月二十有八日
以疾終于寢享年四十有二天子惻然所以賻襚之禮

甚厚寓殯國南奉先佛寺侯風度秀整雖平居不妄笑
言尤敏悟好學方爲兒童時日誦書數百言既而返復
無所遺及長博通五經嘗學春秋於孫復又學易於王
獵積十餘年益究聖人之淵源或有以治春秋易數家
之書進以廣侯之學侯謂曰衆子澆澆徒使後學者見
惑爾皆不足取由是知侯學春秋易爲深頗工於歌詩
慕唐李長吉之格初侯寢疾日劇諸仲請益訪良醫侯
曰氣索矣顧生不有數耶雖吏跼何益也言訖而逝於

是聞者以侯爲知命娶錢氏繼室以高氏封文安縣君
子男二人長曰令襄右監門衛大將軍次曰令捷率府
副率蚤亡女三人長適侍禁高士敦二尚幼令襄亦力
學爲善以承其家八年十月甲午從仁宗皇帝葬河南
永安之原銘曰懿王之後世多有聲循循維侯不矜虛
盈從二先生學春秋易衆子紛負維聖之蹟侯有美業
湫莫見施又奄不淑孰天詛之

宗室金紫光祿大夫檢校國子祭酒右監門衛

將軍兼御史大夫上柱國天水郡開國侯食邑
一千二百戶贈右武衛大將軍墓誌銘

嘉祐八年二月四日丙子右監門衛將軍諱世英以疾
卒于睦親之第天子念宗子之傷憫然加惠以右武衛
大將軍之祿寵其隳前春秋三十六曾祖德昭吳懿王
祖惟和永清軍節度觀察留後安定郡公父從審為寧
國軍節度使觀察留後宣城郡公母渤海郡君吳氏燕
王延祚之後將軍於屬籍蓋上兄弟之子明道二年初

賜名爲右班殿直改太子右監門率府副率歷太子右清道率府率皇祐二年宗祀明堂遷右監門衛將軍累階金紫光祿大夫檢校國子祭酒兼御史大夫勲上柱國爵天水郡侯食邑一千二百戶將軍字務實孝愛謙靖喜愠未嘗見於色每夙興退朝必陳詩書于前終日究覽而不知勤樂近賓友間以觴詠自娛遭父母喪尤哀瘠過人娶張氏封南陽縣君繼室以錢氏封福昌縣君子男七人長令駙次令纘並右監門率府率次皆蚤

亡女三人長許嫁侍禁錢營緒次尚幼葬河南永安之
原銘曰歲癸卯月癸亥日甲午窆安之從昭陵永以固
宗室金紫光祿大夫檢校太子賓客右武衛大
將軍使持節舒州刺史充本州防禦使兼御史
大夫上柱國清源郡公食邑二千一百戶食實
封三百戶贈安化軍節度觀察留後高密郡公
墓誌銘

惟皇從兄高密郡公諱宗望字子國太宗皇帝之曾孫

潞恭憲王元佐之孫安遠軍節度使密國公允言之第
七子初命爲供奉官先帝念邢王之後不可以無祀命
公以內殿承制實嗣邢國是爲文惠王元傑之孫景祐
中朝廷始用衛府之秩寵加同姓改右監門衛將軍慶
厯中詔封諸王之裔遂爵清源郡皇祐二年秋祠合官
除右領衛大將軍積遷右武衛大將軍舒州防禦使公
少聰警力學善屬文其進止方重馭內外嚴而有法然
不以富貴加人喜親師友每陳書於前觀自昔忠義之

士未嘗不掩卷而嘆作戒子文刻石齋楹下其大畧以
世祿驕華爲戒初先帝嘗勅宗室子弟學虞永興之書
公退閱字法亟書十字文一卷以進上嘉其筆翰精婉
特寵以刺史之拜後復於延和殿試宗室子弟所學書
令宗正第其高下以公書第一比獻所爲文上問所欲
願盡賜國子監書以免詒子孫之學遽從其請先帝好
飛白書侍從蒙賜者以爲榮公前後所得殊多又嘗以
金泥紋羅書宗望好學樂善及爲善最樂字以賜之非

它儻也公因請建閣第中貯帝所賜書既成上又爲親書閣名其見寵遇若此公所被賜予多賙人之急外姻之貧未葬者公爲出金贈斂而葬之聞者高其誼今年春聞先帝寢疾甚因謂族人曰雖託肺腑而不得進侍左右吾積沈憂恐先犬馬不能以報厚恩未幾果發疽太醫馳視已不及其終嘉祐八年三月十七日也啟手之夕召諸子牀下受遺令其言如戒子文享年四十四上聞惻然爲哀命入內供奉官梁從政典護喪事所以

賻襚之禮甚厚贈安化軍節度觀察留後高密郡公其
年十月甲午仁宗皇帝英昭陵遂舉公之喪西祔于文
惠之園夫人張氏封永嘉郡夫人贈太師兼中書令徐
國公耆之女先公亡子男七人長仲訥次仲嘉皆右監
門衛大將軍次仲炎仲峭皆右千牛衛將軍次二子蚤
亡次尚幼女五人長適侍禁李天益封南陽縣君次適
侍禁李庠封華容縣君次二女蚤亡次尚幼銘曰天子
仁恩閔族弗緒有賢維公實大邢字其來有儀組鞞鏤

膺以丞以嘗孝孫是承夙志于學德日俊茂鉏首金葩
賜書盈構計聞幾何忽出綴衣素車之從萬社無期

宗室推誠保順守正翊戴功臣寧國軍節度宣
州管内觀察處置等使開府儀同三司檢校司
空同中書門下平章事使持節宣州諸軍事行
宣州刺史上柱國天水郡開國公食邑七千六
百戶食實封二千二百戶贈中書令追封博平
郡王謚安恭墓誌銘

治平元年七月戊辰博平郡王諱允初薨于其第初上聞王被疾亟遣中使候問又飭太醫日夜侍王疾及訃至乘輿即臨其喪爲哀涕之不勝上還止輦以王後事屬於其兄襄陽郡王允良泣拜曰不幸仲氏無子願擇所以宜爲嗣者於是詔魏恭憲王之後右監門率府率仲速出繼爲王之孫以奉其祀焉方是時天子在諒闇中不得爲王成服輟視朝三日贈中書令追封博平郡王其賻恤之物甚厚以天章閣侍講傅卞攝鴻臚卿入

內內侍省都知鄧保吉同護喪事於是官僚狀王之行
上於有司而謚曰安恭其年十一月丙寅具鹵簿儀物
葬于河南之永安縣祔先恭肅王之園有詔禁林誌王
之系出官封與夫始終之大節納其墓中臣珪實爲之
謹按王字累之初名允宗更賜今名其于屬籍蓋上之
諸父也宣祖之曾孫太宗之孫吳恭肅王之子母曰魏
國夫人張氏甫五歲授右千牛衛將軍三遷爲和州刺
史歷汝州團練使齊州防禦使華州觀察使定國軍節

度觀察留後威德軍節度使上即位以寧國軍節度使
拜同中書門下平章事明年詔五日一奉朝王固辭上
寵答之不許居亡何王薨夫人榮國夫人慕容氏王爲
人靜慎謙慤其入朝恂恂有常節未始以風雨輒廢也
家居愠喜不見其色凡奉入有無一不問惟樂賙於人
天性寡欲終身不近聲色少好釋氏至誦其書數十萬
言亦有其絕見者歟銘曰帝親同宗雖遠猶篤矧如近
籍長而加淑懿懿惟王太宗之孫不以富貴而流世紛

天子念之曰予叔父其朝五日猶謂予顧天不畀予以
殄藩英何以飾終追王博平巍巍三陵山河左右王從
下游其宅則厚

宗室延州觀察使夫人京兆郡君宋氏墓誌銘
延州觀察使同判太宗正事安國公從古之夫人宋氏
其曾祖廷浩尚後唐莊宗義寧公主爲房州刺史是生
偓偓尚漢祖永寧公主入朝歷忠武軍節度使同中書
門下平章事追封廣平郡王是生元載元載爲東頭供

奉官閤門祗候夫人其長女也母曰西華縣君錢氏初
藝祖皇帝納孝章皇后蓋偃女也夫人以世族選爲安
國公之配安國公今天子之從兄也夫人生十年母教
之剪製之事音律之法詩書之言其性聰悟所學輒過
人後五年乃嫁嫁四十六年乃卒夫人端靖謙恭能以
禮下人故閨門之中長幼之序莫不法式喜觀浮圖書
其奉度儉節無珠玉纂組之玩先帝知安國公之賢使
以主大宗之事而夫人實左右之夫人病且革召其子

孫床下謂之曰吾奉宗祀有年矣老而益不敢懈夫富貴易靡于人汝曹勉近於學亡以歌鐘狗馬而自溺其志也治平元年六月五日卒嗚呼可謂賢也矣上遣內司賓來弔祠又命內侍羅允和以視喪事藁殯于國南之承天院明年十一月庚寅葬河南永安縣夫人名道柔字仲和封京兆郡君男十二人曰世邁故右領軍衛將軍曰世瑞曰世儔皆右監門衛大將軍曰世法曰世闊曰世設皆太子右監門率府率一未賜名餘蚤卒女

十三人其適西頭供奉官康德修封晉寧縣君一尚幼
餘蚤卒孫二人曰令諼曰令騶皆太子右監門率府率
其將葬也有詔史臣考夫人之淑行以爲之銘銘曰有
齊孝章儷德皇祖有婉夫人自其華緒夫人有行宜于
而室春秋奉祠其薦嘉吉勉其子孫信厚是履臨終之
言一何亶亶鬱彼新封以永于藏其固萬年徽音不亡

賈黯墓誌銘

治平二年十月戊子翰林侍讀學士長樂賈君卒于京

師先君病且革天子遣使挾太醫日夜臨視之君卒不
能起贈尚書禮部侍郎又賜黃金其家明年正月辛酉
葬于鄧州穰縣冠軍里將葬其孤士彥以君功狀來求
刻文而納于墓中太原王珪爲之序成都范鎮爲之銘
序曰按賈氏其先周康王時唐叔小子公明封于賈遂
以爲氏其後始顯于漢魏之間而望出長樂者世最大
君諱黯字直孺世居真定之獲鹿自君之曾祖始徙于
穰下今爲穰下人君少警悟方七八歲時見其所作詩

而驚偉之慶歷六年中進士第爲天下第一除將作監丞通判襄州事代還召試學士院拜著作郎直集賢院判尚書刑部祀明堂覃恩遷右正言君年少方進用遇事感慨數上言朝廷仁宗識君手書常嗟賞之御史中丞王舉正留守百官班將以事見上尚書郎杜樞獨出班問所以留班狀久之貶樞監稅衡州蓋樞嘗駁開封府張彥方獄而事連權貴人皆知以此得罪也而莫敢言君爲力言之其後諫官御史皆爭事上前不能止因

詔臺諫官自今須繇閣門白中書俟旨然後得上殿君
又言曰羣臣獨得與上論事惟諫官御史爾今既不得
時見上萬一有非常上何繇得聞邪固請如舊制彰化
軍節度使狄青爲樞密副使君以謂祖宗定天下而立
勲勞者多武臣然未嘗得與議帷幄者今承平之日久
而驟用青行伍中使四方聞之以爲朝廷無如青必有
輕中國之心又宿衛諸軍見青尊寵若此皆傾心歸之
此尤不可不察遷三司判官同修起居注奉使契丹還

遷右司諫至和元年擢知制誥權判吏部流內銓益州
推官乘澤在蜀三年不知其父死及代還銓吏不爲領
文書澤始去發喪若是豈爲孝乎卒使坐廢田里晉州
推官李亢嘗入粟得官後以罪引去他日應舉及第當
改官始自言其嘗以罪去也君曰士之罔冒其罪可置
乎遂奏罷之福州推官劉抃在銓俟引對而自以曉星
氣挾此以游公卿之門君乃奏以爲靈臺卽於是士人
之知術數者不敢以自名君初修起居注見天子退朝

御邇英咨訪治道而吏官不得與聞至是因修起居注
入與經筵遂爲定制嘉祐元年君以父春秋高請知陳
州尋改許州明年遷尚書兵部員外郎徙襄州屬父疾
歸南陽至家而疾篤君亦自移疾委郡事佐官而去即
日上書自劾臺諫官以君輒去郡爲言降知郢州已而
離父憂服除君以前嘗謫郡不敢入朝詔趣還之勾當
三班院明年召入翰林學士判昭文館以疾復請郡乃
除翰林侍讀學士戶部郎中知鄧州未行復以爲翰林

學士知審官院先是朝廷以京朝官每三歲輒自言求遷官非所以敦養廉恥於是詔當遷者有司爲舉行之而朝士之近名者輒或辭磨勘至數移督之不得止君以謂鄉者使其自言而士之不求進者宜有以旌異之今無復自陳之嫌則士大夫何以辭不願磨勘也是亦矯妄之人徼取恬退之譽陰圖進擢之望皆無益風化且考課之法豈特以歲月遷亦將稽其殿而黜之請凡磨勘者有司不復督中書爲籍記之其後雖甚久皆毋

得輒遷朝廷從君言於是僞辭磨勘者不復至矣七年
遷左司郎中知開封府君御下方嚴所至莫不憚之府
吏舊七百人而諸嘗以罪去而復叙者皆籍外補之蓋
嘗數百人公乃奏爲條其得復叙者須候籍中闕乃稍
補之又府吏之給事他官者更七次則一遷於是他官
之請者歲不可勝數至有一事累請而爲兩役者君又
奏爲條以其從事之所難者始得爲次數餘悉罷之於
是府吏取君所決十餘事緣飾而倡言之御史亦以是

繩君仁宗見執政問賈某所爲私乎對曰無有私也然而言已遂易君同提舉在京諸司庫務今天子即位遷中書舍人受詔撰仁宗實錄更羣牧使治平二年拜給事中權御史中丞充理檢使上方親政事君數見其言無所避上嘗謂君曰朕欲用人而未識其可者對曰天下豈嘗乏人耶在陛下所用爾乃陳任人之法五事一曰知人之明二曰養育以漸三曰材不求備四曰以類薦舉五曰擇取自代天子嘉納之是時某尚德寧公主

君言曰國朝公主下嫁皆以祖爲父以父爲兄非所以
正人倫之道也願詔諸公主下嫁如唐故事令盡其見
舅姑之禮有司議濮王稱皇伯而不名朝廷下其議三
省君勸上從有司議未報八月京師大雨水君時以寢
疾復兩上疏以爲簡宗廟逆天時則水不潤下濮王議
宜以時蚤決以塞變踰月君疾未已願罷御史中丞乃
除翰林侍讀學士知陳州纔數日而卒享年四十四曾
祖延隱太子右監門率府副率祖昭遜內殿崇班閤門

祇候父汶著作佐郎致仕贈少府監母陳氏繼母史氏
陳初歸其宗父戒君他日能自顯則往迎之君卒迎陳
母歸封仁壽郡太君史封唐安郡太君凡四娶馬氏任
氏周氏皆蚤亡最後娶薛氏今封延安郡君二男子長
元素蚤亡次士彥太常寺太祝五女子君所著文集三
十卷尤長於議論云銘曰世言直孺舉進士第一不十
餘年踐兩禁爲得志而不知直孺之事兩朝開陳補益
如此嗚呼使天假之年盡其所蘊則其澤之于天下可

勝既耶

欽定四庫全書

卷五十四

欽定四庫全書

華陽集卷五十五

宋 王珪 撰

墓誌銘

寇平墓誌銘

治平二年十二月庚戌太常少卿直昭文館知鄭州上
谷寇公感疾終於州之正寢明年二月甲寅葬於許州
之荆山以從其先塋也寇氏出上谷公之遠祖始徙大
名之萃縣遭石晉之亂又徙幽州端拱中太宗北征契

丹公之大父挈其族以歸太宗欲有所用而大臣疑之
乃得除官流內銓為萊州即墨令因家于膠水而三世
不遷故參知政事蔡文忠公公之舅也公少孤依外家
以逮於成人文忠公視公如已子而公外祖母楚國太
夫人尤愛憐之天聖五年以文忠公恩為試將作監主
簿當除莫州鄭縣主簿換沂之沂水縣未幾棄官歸為
學舉進士景祐元年及第除試秘書省校書郎知深州
靜安縣未行改開封府倉曹參軍長吏皆薦之遷著作

佐郎簽書淮康軍節度判官徙通判宿州丁母憂時文忠公已捐館舍楚國太夫人春秋高公奉養朝夕惟恐其不至服除以秘書丞通判徐州民苦輸鐵於官至破產矣猶責之不已公請以十之三均旁郡之戶至今便之轉運使沈邈奏公最為第一得權知淮康軍遷太常博士及邈還朝又薦公於上前言他日可任以事始至淮陽會獄有繫囚當誅死公疑其未得實而更訊之果為吏所誣囚且釋吏僅得減死衆皆相勅不敢以毫髮

欺公一日有告軍變者公既密得其名乃陽以為妄言使去明日大閱於鞠場因盡擒之是歲盜羣起而軍壁頽廢民不安其居公為調農隙而完築之於是里人欲立生祠於岨山之陽公不許召充羣牧判官賜五品服歷判三司開拆司遷尚書戶部員外郎奉使契丹還為京東轉運使先是流民以男女傭於富室者遇歲豐欲贖之不可得公勅其部中悉取以還其家又罪人之隸海島者過百人則不得其所公以謂朝廷既貸其生而

返離非命非所以助上恩乃重為立法其後更赦多得
生還者徙淮南轉運使再遷兵部員外郎真州長蘆寺
瀕大江而章獻太后時歲度僧者七人令置小舟上下
以揀沉覆之患歲久事輒廢而度人猶如故公使籍其
所活五人以上始得度人如舊式泗川流屍積上下者
不勝數公為請歲給三百千悉祭而埋之知州朱處仁
為金石刻以紀焉入為三司戶部判官更度支勾院遷
工部郎中時契丹使來詔特選以為送伴使公嘗言敵

事上前仁宗壯其言他日召羣臣迎陽門觀書帝目送者久之及出知徐州賜以三品服左右或以為非例帝曰此特出朕意也頃之淮陽戍兵殺巡檢以叛鄰州皆驚公亟傳檄海上使舟楫遠去又募勇敢士授以方略令傳官軍以行既而賊果領衆東遁至海不見舟而還遂掩獲之賜書褒諭再遷兵部郎中加直昭文館徙知潞州今天子即位遷太常少卿仁宗山陵調用百出公不以一毫擾民在潞歲累登他州之流冗至者相屬公

為調發官廩以賑之所活數萬人又徙滑州因得覲京師為上陳天下利害事甚衆又徙鄭州以終享年六十二公諱平字均轉為人樂易而不為激訐之行尤篤於朋友故舊其貧不能婚葬者婚葬之其政大抵先學校所以勸勵風俗簡於簿書期會而凡案亡留事故其去人必見思慶歷中嘗上政本書五十篇治平初又上陳宜書三十篇若寬天下力役定士子令汰冗官教宗室市邊馬復鄉兵多施用其言又自述平生感遇事作考

祥集采其所見聞有足以自警者作警異志公雅為今
樞密副使吳公長文翰林學士承旨張公安道所器公
亦善自薦士其後多取尊顯而獨滯於為郡志不大展
其命也夫曾祖顯贊避亂不仕祖日用終即墨令父肅
以行義見推鄉閭贈官至光祿卿母蔡氏泰興縣太君
懿行為內外族之冠娶李氏安昌縣君順淑有婦德子
男四人昌齡進士及第試祕書省校書郎昌圖太廟室
長昌朝太廟齋郎昌言蚤卒女六人適殿中丞張頴將

作監主簿郭紳太常寺太祝王欽臣任保之殿中丞蘇
充太常寺奉禮郎韓敦復孫男四人安國定國充國彥
國銘曰冠始北遷以義來輔膠水之間公考有裕恂恂
維公文忠之甥力政以學豈不有聲彤幘駢駢兩驂如
舞民樂且閑四州是撫昔與公遊多貴於時公終在外
而迹逶遲光原之豐維龜又食公安萬年其竊無易

永壽郡太君朱氏墓誌銘

永壽郡太君沛國朱氏贈給事中始平馮公諱式之夫

人其先家京兆之萬年遭唐季之亂關中舊族多散適
荆湖南夫人皇祖亦挈其家至潭之衡山後又徙江陵
遂為江陵人皇曾祖諱祕唐夏州安撫判官檢校尚書
比部員外郎皇祖諱葆光贈尚書兵部郎中皇考諱昂
尚書工部侍郎致仕贈刑部尚書始尚書為翰林學士
請老江陵方是時夫人年十四端重寡言尚書愛賢夫
人擇所宜歸及見給事所為文大器之遂以歸夫人之
歸其治家有法自冠婚喪祭祀帛俎醢莫不有禮意接

內外姻族尊者恭之下者拊之而恩勤一也又自薄奉
養雖尺帛不妄費一有嫁婚視篋中所積蓋十具八九
故馮氏雖甚貧而嫁婚能不失其時凡嫁姑二人女五
人子若孫娶婦者八人凡受諸女婦之事甚衆若顰刻
組繒之工其學皆精巧過人至今荆襄間稱馮氏家法
往給事為左侍禁自以負所學而不得志幾欲易一簿
尉夫人輒謂曰窮達顧不有命寧介而跼將屈而遂之
乎給事為止給事既捐館舍夫人携諸孤居鄂州自教

讀書賓客之過門者夫人知其賢嘗躬為飲食之故其子雖少而名動京師皇祐元年天子親試進士而其子遂以文章為天下第一及其歸里巷皆歡呼動色而夫人獨不為之動迨其子為翰林學士題名之日夫人復自為具令盡會兩制玉堂上已而翰林君即尚書名下題曰外甥馮某歸以告夫人於是夫人喜不自勝矣夫人方困約時惟知教子之為樂不以不自給為憂後其家日愈顯夫人猶衣故時之衣蓋終身不以貧富易其

節其性素嚴若不可犯故雖幼穉過夫人前必斂手無
敢戲侮至子出為官然未始不以寬恕為言也治平二
年翰林君知貢舉聞夫人被疾數請歸上報曰朕自勅
太醫日夜視夫人疾毋深念也又嘗賜御膳者再間遣
使者至夫人卧内所以撫存之甚厚夫人春秋高稍間
輒復病翰林君致四方名醫又叫號神明禱禳之無不
至明年八月丙午夫人卒不起享年七十有二其年十
月庚寅祔於河南府密縣義臺鄉南朱村給事之墓夫

人初封仁壽縣太君嘉祐祿饗翰林君時為龍圖閣待制願上所遷官封長安郡太君後累封永壽郡四男子襄定州原武縣主簿袞大理評事京翰林學士尚書禮部郎中羣牧使奕將作監主簿五女子以歸尚書屯田員外郎周傳比部郎中康衛國子博士張湜進士劉誥大理寺丞宋稱孫男十一人詵諮諝誼訢詰許証認孫女二人曾孫男四人銑鎬鉶曾孫女四人銘曰諄諄尚書知女所從不擇高華而擇於馮馮公有聞仕

非其志夫人勉之毋屈而遂有節夫人而又知子能為
尚書實始以喜亦既受祉以莫不增帝出玉饌夫人是
承奄其不存尚有遺則維子維孫其服無斁

宗室金紫光祿大夫檢校太子賓客左驍衛大
將軍持節淄州諸軍事淄州刺史充本州防禦
使兼御史大夫上護軍天水郡開國公食邑二
千七百戶食實封二百戶贈武寧軍節度觀察
留後追封彭城郡公墓誌銘

臣謹按僊源之圖太宗皇帝之曾孫韓恭懿王元偓之
孫東平郡王允弼之第二子今上之再從伯也生五歲
在仁宗朝為右侍禁景祐三年朝廷以環衛之秩大更
宗子官遂除太子右司禦率府率積遷左領軍衛大將
軍化州刺史又領慈州團練使英宗即位遷左驍衛大
將軍淄州防禦使治平二年六月乙丑以疾卒享年三
十七母李氏崇國夫人娶沈氏封遂寧縣君生男二人
曰仲瑩右監門衛大將軍曰仲頌右監門率府率女二

人其將葬也臣又得官寮所上狀言其為人端重素好學通尚書禮記尤長於篇詠喜音律方十餘歲時嘗從東平王朝三陵下既歸能道所過山川形勢之處畧無所遺王愛之絕深及得疾而醫診禳祈之術徧索於京師然而卒不起天子聞訃閔然一不視垂拱朝贈武寧軍節度觀察留後彭城郡公後二年八月癸酉葬河南之永安縣其諱宗執字用之云銘曰東平好善匪獨舊聞能勅諸子卓卓不羣誰不富貴之子務學今雖云亡

亦後之覺

宗室金紫光祿大夫檢校右散騎常侍右武衛
大將軍使持節絳州諸軍事絳州刺史充本州
防禦使兼御史大夫上柱國天水郡開國公食
邑二千七百戶食實封四百戶贈武寧軍節度
觀察留後追封彭城郡公墓誌銘

今天子之三從兄彭城郡君諱世延字叔僖吳懿王德
昭之曾孫冀康孝王惟吉之孫丹陽僖穆王守節之第

五子母彭城縣太君劉氏公方為兒童時嘗入見章獻
太后於禁中仁宗因謂太后曰渠父好讀書試令念詩
於是念唐名賢詩數十篇仁宗嘉其敏雋遂賜名以為
右侍禁稍遷西頭供奉官景祐二年朝廷以環衛之祿
以寵諸宗室乃換右千牛衛將軍歷右監門衛大將軍
領欽州刺史又領寧州團練使遷右武衛大將軍領絳
州防禦使治平二年七月癸酉以疾卒享年四十四贈
武寧軍節度觀察留後追封彭城郡公公天資端厚篤

於好學通王氏易及孟子至於星歷考驗之書無所不究尤喜為詩每與諸公子唱酬而風思獨為精慶歷中上方鄉文學而嘗進所著詩賦賜書褒諭仁宗又嘗親書世延字以賜之晚尤喜釋老之書其視富貴蓋泊如也夫人崇仁縣君李氏天雄軍節度使隴西郡王繼勲之孫子男四人令續右武衛大將軍梧州刺史令擢太子右監門率府率其孟季蚤卒女八人無在者後二年八月癸酉葬先帝於永厚陵而宗室之喪皆從窆原下

其空公亦用癸酉之良銘曰習富易墮習貴易荒返裕
以學孰匪為良受祉既多維皇之睦奄其不存猶有後
躅

宗室金紫光祿大夫檢校右散騎常侍右羽林
軍大將軍使持節慶州諸軍事慶州刺史充本
州防禦使大夫上柱國天水郡開國公食邑三
千戶食實封六百戶贈武寧軍節度觀察留後
追封彭城郡公墓誌銘

惟彭城郡公諱宗嚴字子莊太宗皇帝之曾孫魏恭僖
王諱元佐之孫中書令郇國公諱允成之第五子母曰
霍國夫人康氏初命右侍禁歷東頭供奉官內殿承制
換右屯衛將軍遷右武衛大將軍領簡州刺史又領鳳
州團練使先帝即位以為右羽林軍大將軍慶州防禦
使階至金紫光祿大夫檢校右散騎常侍兼御史大夫
勳上柱國爵開國公食邑三千戶實封六百戶治平二
年十二月戊申以疾卒天子念傷之輟視朝一日遣中

貴人視喪事賜賻物加等贈武寧軍節度觀察留後追
封彭城郡公公性謙靖貴而能下人家無車服珍奇之
玩惟聚古聖賢之書每退朝日陳於前不以寒暑輒廢
觀也仁宗屢賜以太清之書初霍國夫人春秋高忽一
日得疾公憂悸至不食霍國薨公亦不復起云享年五
十三四年八月癸酉葬河南永安縣三陵旁公先夫人
韓氏後夫人潘氏封河南郡君子男十六人仲虞仲新
皆太子右內率府副率蚤亡仲防右武衛大將軍施州

刺史仲商仲儋皆右監門率府率餘不及名女十七人
其歸左侍禁傳其璪封長壽縣君歸左侍禁李文紀封
仁和縣二尚幼餘皆蚤卒孫男一人士綏右監門率府
率銘曰大林多材而工度之英英公族乃抑弗施維其
有聞止曰好善展也彭城亦允以顯其顯伊何天子賜
書日陳於前以燕以虞三陵之旁行者皆畏公從萬年
其靈未昧

欽定四庫全書

華陽集卷五十六

宋 王珪 撰

墓誌銘

賈昌朝墓誌銘

治平二年七月戊寅觀文殿大學士尚書左僕射魏公
薨於京師始公得疾甚英宗命中貴人挾太醫晝夜調
護所以念之甚厚及訃聞是日休吏羣司乘輿趣臨其
喪為之泣下乃詔輟視朝二日贈司空兼侍中其賻物

加等將歛又賜龍腦水銀以納其匱中八月甲寅上成服于苑中於是其家條具功狀上于太常謚曰文元熙寧元年八月庚申葬于許州陽翟縣大儒鄉元老里之原公諱昌朝字子明姓賈氏其先漢長沙王太傅誼之後至唐僕射魏國公耽復以儒學相德宗而世為滄州南皮人後徙真定之獲鹿皇太祖緯晉中書舍人追封魯國公皇祖璉太子左贊善大夫追封齊國公皇考注秘書省著作佐郎追封晉國公皆贈太師中書令尚書

令曾祖妣崔氏封吳國太夫人繼栗氏封韓國太夫人
祖妣胡氏封周國太夫人妣史氏封燕國太夫人自公
之皇考始去獲鹿而葬于開封今為開封人初晉公一
夕夢使者奉貂冠玉簡于大箱中拜而受之以告燕國
夫人明日公乃生公少孤母日教誨之自經史圖緯訓
詁之書無所不學天禧元年真宗祈穀于郊獻書車駕
前賜同進士出身補常州晉陵縣主簿引對便殿以為
國子監說書即除江州德化縣令孫宣公初判監命學

官各講一經獨稱公所講有師法一日往謁宣公宣公遣人示唐相路隋韋處厚傳公讀已宣公乃出見公曰後當以經術進如二公願少勉之天聖元年兼潁州郡王院伴讀遷大理寺丞以殿中丞知常州宜興縣徙知龔州以母老辭得監在京廣濟倉翰林學士徐奭權知開封府舉公知東明縣遷太常博士是時宣公且老數辭講禁中乃薦公為代召試中書而參知政事陳文惠公與公有親嫌言公年少未可入侍經筵宣公復言先

朝用晏殊宋綬知制誥皆年未三十朝廷用人可悉限
以年邪然文惠終抑之徙通判綿州又以母老得監在
京永濟倉明道元年遷尚書屯田員外郎復為國子監
說書方章獻皇太后稱制詔避彭城郡王名公言在禮
母之諱不出宮中今天下為太后諱其父名非所以尊
宗廟初不報及太皇上僊乃用公言罷景祐元年擢崇
政殿說書俄加直集賢院判尚書禮部天子方鄉文學
每授經之際多詢質疑難公因請以聖問所及政教道

義之言令講讀官悉綴錄之以上史館於是作邇英延義二閣注記三年秋太平興國寺災而議欲復修公言比年京師觀寺屢災此天佐興王者故數下災異以誠告之願陛下側身念愆以思答天之實於是遂止不修再遷司封員外郎天章閣侍讀判太府寺為史館修撰天子每祠南郊必先謁景靈宮乃齋太廟公言躬享景靈宮初用唐朝獻太清宮故事事出一時不足以為法請須郊祠還然後行謁謝之禮下議有司不合乃寢趙

元昊叛延州總管劉平章敗于北川或言平實降賊朝廷以兵圍平之第公言王繼忠陷賊中先帝遇其家反厚及契丹約和繼忠與有力今計平豈遽降而先收戮其家使平果存亦不得還矣即詔弛圍兵既而果得平戰沒之狀乃厚恤其孤遷禮部郎中康定元年三月丙子大風晝冥詔罷春燕公言今災變屢見初莫不恐懼已則泰然為無事切考災異之所從固不虛發願陛下修飭五事以當天心雖罷春燕恐未足以塞大異也居

數月權知制誥權判吏部流內銓為館伴契丹使河北
旱蝗為體量安撫使既還條所以制邊之策甚備其言
擇守宰習鄉兵治塘泊紓繇役繕甲壘之類皆當時施
用之除龍圖閣直學士兼侍講權知開封府有禁衛卒
告軍中歛率緡錢本屬以其事移府衆皆伏府門惴恐
不自安公上詰其告者不實坐之餘置不問仁宗大然
之為南郊頓遞橋道使時西疆未寧詔公護行在以察
姦非知開封府不侍齋祠自公始慶厯元年遷右諫議

大夫權御史中丞充理檢使侍講如故自唐羣臣見謝
辭皆過天子正衙五代草創過衙乃在其後公始釐正
之未幾刺國子監詔公與三司官吏減省浮費前此公
上疏言國家用度素廣而民力不足日者屢詔有司省
節浮費未聞卓然施行今陝西用兵而無先事之脩竊
為國計憂之願較景德以來訖于景祐財用出入之數
約祖宗舊制其不急者一切省之至是內自宮掖外及
權貴而下歲省用凡數百萬駙馬都尉柴宗慶前在鄭

州縱其下擾民及遣使問狀而托疾不即應更請出為郡公劾奏宗慶託國肺腑而所為不法乃復使為郡恐益為民患於是詔留宗慶京師侍講林瑀上會元紀且言推帝王即位必遇辟卦而真宗乃得卿卦公奏瑀所學不經不宜備顧問遂絀之契丹遣使求關南之地且議和親復為館伴使公言和親辱國而尺地不可許議者又欲以金繒啗契丹而使平夏州公言吐蕃尚結贊欲助唐復京師而宣公數諫止之後得謀者乃朱泚賂

吐蕃欲使陰為之援今契丹乘元昊叛有求於我未必
遽肯出兵就使兵出而小有勝何以塞其進取之心時
方命公使契丹於是力辭其行又言藝祖有天下收方
鎮之權當時以為萬世之利及太宗在位將帥多姻舊
之臣而戮不逮恩然猶仗神靈卒剋暴海內自時用武
之勢乃衰近歲恩倖子弟非有橫草之功而坐取武爵
乘邊隅無事猶以自容一旦西方用兵以千萬卒之命
為庸人驅之死地豈不憤哉顧思所以修內治外之術

以銷難未然復陳脩邊六事凡數千言帝嘉納之三年
遂參知政事明年以檢校太傅尚書工部侍郎為樞密
使又明年拜同中書門下平章事集賢殿大學士兼樞
密使纔兩月拜昭文館大學士監修國史提舉編修唐
書陝西既罷兵公遂還樞密使因言近歲國馬耗而河
西蕃部馬不至請樞密使兼羣牧制置使如先朝舊制
從之會詔有司議章獻章懿章惠三后升祔之禮令中
書門下考詳其事而禮官或援古不同公乃酌羣議而

奏曰恭以章獻皇后母儀天下章懿皇后誕育聖躬宜如祥符升祔元德皇后故事配食真宗廟室以稱陛下追孝之意章惠皇后于陛下有慈保之恩義須別祠伏請享奉慈廟如故於是命公攝太尉奉二主行升祔之禮已而將下德音內出密封中外文武官皆遷官諸軍皆特支公獨匿其事即奏以為不可雖同列莫與聞者明日惟在京諸軍與特支又詔二府特遷官公又以為不可乃已七年春大旱公引漢災異冊免三公故事願

上丞相印意甚確遂拜武勝軍節度使檢校太傅同中書門下平章事判大名府兼北京留守司事河北安撫使及帝謝雨西太一宮而公獨不從詔下閤門吏開封府以其不即報公公既辭賜燕國太夫人銀飾肩輿士大夫以為榮貝州妖卒王則叛初則約連河北京東數州之兵欲南斷浮橋以據大名事未及發會有白衣遮公馬首自言少遊跪泉山能言國家休咎之事公疑而詰之乃得所挾書實貝州叛逆也其黨知事覺於是嬰

城自守公命高陽關路總管王信大名府路鈐轄郝質
真定府路鈐轄孟元將六部兵二萬趣城下并遣穴城
匠作車洞距闔以攻賊公亦屢請行朝廷賴公威名在
大名不許及破賊以功為山南東道節度使檢校太師
進封安國公其年日官言太陰犯畢距星又掩其大星
公因言畢昴之間為天街其陰外國也其陽中國也顧
其警必在季秋之分因考歷代所占凡十二事上之會
歲饑民大疫公為置病方給養之全活九十餘萬契丹

募亡卒之勇伉者得五百餘人號投來南軍驅以戰西
羌邊法雖歸亦殊死公乃檄邊郡凡投還者一切貸之
後有還者公更遷補之賊聞遂除其軍不用邊民之貧
者多避賊繇以其地質賊人因而寢為賊所侵公為設
法聽旁近戶之有力者贖之歲餘悉復其地契丹使來
每道公境必斂服自飭且戒其徒御毋得有所犯公嘗
言河自橫隴之決分流德棣恩滄數州而歲為害滋甚
按九河既湮惟行漯川之道歷代雖徙決不常然不越

濮鄆之北魏博之東今其道歷朝城由蒲臺入海者此
禹漢遺功也請復河故道不報明年河決商胡水環大
名公乃繪漯川橫隴西商胡為一圖復條其利害以聞
詔遣三司副使鄭驤行視其地還言功大不可就乃止
皇祐元年以燕國太夫人春秋高願徙鄭州及入覲乃
以為祥源觀察使公不敢以將相留京師屢請還節除
觀文殿大學士尚書右僕射判都省再提舉編修唐書
其冬以右僕射復除山南東道節度使檢校太師兼侍

中判鄭州凡六上章乞罷僕射兼侍中復拜同中書門下平章事詔公子四人皆遷官固辭之使相初無中謝之賜其賜自公始明年丁母憂會大雨奉喪徒行數百里詔屢起之公懇斬終喪給以宰相俸之半辭之給以僕射俸又辭之於是賜黃金三百兩服除判許州仁宗召公邇英閣問易之乾卦既講陳之翌日又為手奏曰夫乾者天剛健之德當天下久盛之時柔不可以濟然亢而過剛又不能久惟聖人外以剛健決事內以謙恭

應物不敢自矜為天下首乃獲吉也帝面出手詔以寵
答之仍以所陳卦義藏之史館又言漢唐都雍置輔郡
以內翼京師國朝都汴而近京諸郡皆屬它道制度不
稱王畿請析京東之曹州京西之陳許滑鄭州并開封
府總四十二縣置為京畿遂興行之公將行命侍讀學
士以下餞於資善堂五年徙判大名府復為河北安撫
使是時博士李仲昌建議開六塔河欲斷大河東去以
殺金隄之患既而水怒溢隄陘不能禁敗民廬舍不可

勝計公復請䟽河故道且言故道土沃饒多為權右占耕使者妄言功大不可就於是又詔河北都轉運使董沔行視之遂欲決濮陽埽下鄆之錮城導河使東而言其地皆趨下亡壅塞之患侯春調丁夫遠不踰三月可就然朝廷終不報嘉祐元年進封許國公未幾加兼侍中再任大名尋拜樞密使辭侍中三年以鎮安軍節度使右僕射依前檢校太師兼侍中為景靈使其年復出判許州七年以保平軍節度使陝州大都督府長史復

從大名為本路安撫使英宗即位拜鳳翔節度使左僕射鳳翔尹進封魏國公治平元年自言臣老矣不任事願得從閒郡且還鳳翔節度兼侍中詔不許明年春復從許州及入覲上以先帝大臣益尊遇之公亦從容言天下事甚衆因固請還鳳翔節度兼侍中卒不許時京西大疫特詔公候秋迺行公既被病召諸子謂曰勢且革矣尚欲尸重祿邪於是復請乃復以為觀文殿大學士判尚書都省踰月公薨享年六十八公為人外端重

而中裕雖燕居未始見愠喜然於臨事其色不可奪少
好學至顯貴未嘗一日廢書不觀其於古今治亂天人
災祥之學無不該貫故指政言事切而不迂其為政樂
易而不苛前後累鎮許魏民皆見思圖其像學舍而生
祠之為文粹衍有法度字畫尤婉奇公在外仁宗嘗特
遣使賜三朝御書凡百八十七軸其歷崇政殿說書天
章閣侍講觀文殿大學士皆仁宗為公特異之初奉詔
刊修廣韻為集因請修禮部韻畧其窄韻凡十有三聽

學者附近用之又請修唐書及復禮記鄭氏所注月令以李林甫所解唐月令別行著本朝時令十二卷羣經旨辨十卷春秋要論十卷通紀八十卷奏議三十卷文集三十卷公初娶王氏尚書兵部郎中集賢殿修撰軫之女封莒國夫人再娶陳氏武信軍節度使康肅公堯咨之女封魏國夫人後公二十九月而薨六男子章終太常博士集賢校理主尚書比部員外郎田終尚書駕部員外郎青尚書司門員外郎齊太子右贊善大夫炎

太常寺太祝三女子長適尚書比部員外郎程嗣弼封
壽安縣君次適太子右贊善大夫宋惠國封崇德縣君
次適尚書都官員外郎龐元英封壽光縣君孫男十八
人公祚公路公定公弼並光祿丞公度大理評事公裕
公盛公述公望並太常寺太祝公孺太常寺奉禮郎公
靖太廟齋郎公秩公密公詠並未仕公正公亮公迴公
嚮早卒曾孫男一人始公葬晉公于開封以其地下汙
將改卜于許而公薨今遷晉公而偕葬之以成公志云

銘曰維賈氏先出傳長沙有唐魏公又移厥家自公皇
考始去獲鹿公又食魏不遐以續公昔尚少其藩中閤
獻書路旁廼發厥聲始為學官終日默如逮其授經聽
者羣趨卒用所學入講殿中帝曰汝來有發予聰遂相
仁宗左右經術豈無衆訾其勢不屈公於出處以靖以
夷魏許之政而民思之再筦樞衡越歲又遷維是嘉謀
有來上前天清日華聖子有作魏公來朝猶陳舊學間
不見公遽不能起乘輿即臨泣然出涕公位將相不為

不榮矧曰黃髮道德之英曾誰如公篤其終初以示萬世維實維孚

魏國夫人陳氏墓誌銘

故觀文殿大學士尚書右僕射魏國公贈司空兼侍中賈文元公諱昌朝之夫人姓陳氏其先閬州人曾皇祖諱昭汶皇祖諱省華皇考諱堯咨謚康肅皆太師中書令兼尚書令母仁壽郡太夫人朱氏康肅公與其弟兄富貴暴天下而賈氏出于孤寒世莫知有魏公者夫人

既筭康肅公不它擇其歸魏公人或以為疑夫人之歸事其姑甚孝凡奉飲食衣裳莫不便利而時節之遇內外親疎皆主于恩人不見其有驕矜倨慢之色于是夫人嫁時車馬與夫珠玉珍奇之玩不數年間費率盡一日仁壽夫人入獻天子千萬歲壽故事外命婦皆有鎮服之賜仁壽欲予夫人夫人辭曰姑未賜何敢先也未幾魏公入與政事遂與其姑皆受賜禁中魏公罷宰相判大名仁宗召夫人問所欲夫人曰妾以布衣致位公

相念無以報國家不敢以私謁累上德帝為嗟賞者久之嗚呼婦人無外事其能勤儉以正家柔愛以睦族固已謂賢況持節義若此然則魏公之興匪繫夫人之助乎夫人自安福縣君累封至魏國夫人治平四年十一月甲辰薨于開府春明坊之第後魏公二年享年六十三慈壽太后遣中人賻弔之良厚遺奏以其孫公靖為太廟齋郎明年八月庚申同魏公葬于許州陽翟縣大儒鄉元老里生夫人彭城縣太君劉氏六男子章太常

博士集賢校理主尚書比部員外郎田尚書駕部員外郎青尚書司門員外郎齊太子右贊善大夫炎太常寺太祝三女子其嫁尚書比部員外郎程嗣弼太子右贊善大夫宋惠國尚書都官員外郎龐元英孫男子十八人銘曰陳氏世家一門將相偉其聲名天下所鄉康肅知女亦夫人賢以歸魏公或莫我然夫人既歸其從如雲祇厥婦事以富易貧魏公大顯敢為矜驕而又食魏象服以朝天子問之以聽所蘄念無報君何及我私魏

公云亡邦國是瘁誰謂夫人迺至弗惠玉靈食阡從公
下遊尚有來問如川之流

朝奉郎守殿中丞知越州諸暨縣事騎都尉賜
緋魚袋鄭君墓誌銘

君諱民度字仲祥吳郡人少以父任為秘書省正字累
遷殿中丞歷監杭州龍山稅饒州永平監知越諸暨縣
其性端靜有操識而不以事自累其與人語世事初若
不能極辨然默處其是非人固有不能至者家固藏書

晝夜讀之未嘗釋每感慨欲自奮拔以聲名見世數薦
有目不中第及為縣吏材若素出暨于越為大縣生齒
常滿十萬戶君始至與民約曰縣前後所以不治者皆
姦豪撓之今而有亂吾治者必以其狀報州而遷其鄉
于是有犯者而遷之姦豪莫不屏息又縣之上戶皆賦
役于州視它州為最重至有破產而不能供其費民常
苦之君為較其貲之厚薄而均其役之重輕蓋蒙紆其
役者十四五邑人為立生祠是時朝廷方行天下縣令

考課之法而監司以君為第一未及賞而君卒享年四十一曾祖延紹贈太子太傅祖文遂贈太師中書令父戢宣徽北院使秦國軍節度使贈太尉謚文肅母丹陽郡夫人李氏始娶隴西李氏再娶南陽葉氏子男四人曰佃曰億皆光祿寺丞曰倬曰价未仕女六人長適太常寺丞馬昌國餘尚幼君以熙寧二年正月丁酉卒其七月壬午葬吳郡薦福山文肅公之墓次始君訃來佃方為畿下官奔過京師予往見之且曰我先子之志將

大有施於時而不克就今葬有期矣非得天下可信之
文傳其名後世則無以盖先子之大恨予誠哀君大臣
子獨能刻志於學使得時遂行固騰凌彷彿而不可止
然而其用止于是豈其分耶為之銘曰鄭為顯門子孫
濯濯况君多聞實後之覺維瀟不貲文將大發匪特有
文亦躬自絜凡曰有政夫惟利民在暨之迹顧豈不循
年之不遐祿之不多我懷其人計其奈何

